

THEORICORVM PRÆCEPTORVM  
propositio trigesima.

Forma jurisdictionis consistit in legitimo ejus exercitio, de quo vide Wesenbec. *in paratit. ff. h. tit. num. 12.* Finis verò, ut societas humana & in ea religio, pax & tranquillitas conserve-  
tur, l. 4. *C. de sum. Trin. l. 13. ff. de offic. præfect.* item ut lites finiantur, & reddatur unicuique, quod suum est.

Forma &  
finis juris-  
dictionis.

PRACTICORVM OPINIO.

Si generalius inspiceremus finem, non tam jurisdictionis, quàm totius juris est, ut suum jus unicuique tribuatur. Verùm quatenus hîc agimus de administratione juris: non male huc accommodari posse videtur, magis specialiter, quod aliàs universo juri competere videbatur. Et licet præscriptiones finiendarum litium causa sint inventæ, non tamen de illis æquè prædicari potest id, quod de jurisdictione, prima facie videre apparet.

THEORICORVM PRÆCEPTORVM  
propositio trigesima prima.

Effectus jurisdictionis olim erat judicium pœnale, de quo *in l. 7. & sequentib. h. tit.* Hodie actionem confessoriam & negatoriam producit, quam defendit, Wesenb. *in paratit. ff. hoc tit. num. 13.* & Dd. *ad § æquè, Instit. de action.* contra quos disputat Vaud. *lib. 2. quest. 23.* In Imperio Romano est constitutio pacis publicæ, quam fregisse dicuntur illi, qui alios de facto in sua jurisdictione & imperio perturbant. Vide Geil. *de pace public. Anno 1495.* primum promulgata, & *Anno 1555.* repetita.